

01/11/1997

RM23,692 untuk Sarangbangun

KUALA LUMPUR, Jumaat - Malaysia menjadi negara pertama menyumbang kepada Yayasan Sarangbangun Mindanao apabila menyerahkan RM23,692.91 sebagai tanda prihatin terhadap penderitaan bekas pejuang Moro.

Setiausaha Agung Umno, Datuk Sabbaruddin Chik, berkata sumbangan itu menunjukkan kepekaan rakyat negara ini terhadap penderitaan bangsa serumpun di wilayah autonomi Filipina itu.

Yayasan Sarangbangun menyediakan pendidikan kepada lebih 50,000 anak yatim dan projek sara hidup untuk 10,000 balu bekas pejuang Moro di Selatan Mindanao.

"Berikutan yayasan ini menghadapi masalah kewangan, sumbangan kecil ini diharap dapat membantu mereka.

"Kita juga berharap sektor swasta dan individu tampil memberi bantuan kepada yayasan ini," katanya pada majlis penyerahan sumbangan itu di sini, hari ini.

Sabbaruddin menyerahkan sumbangan itu kepada Presiden Yayasan Sarangbangun Mindanao, Edward Iblah Lim.

Kutipan itu dibuat ketika perhimpunan Agung Umno ke-51 baru-baru ini selepas wakil Sarangbangun mengadakan pertemuan dengan Datuk Seri Dr Mahathir Mohamad.

(END)